



ՍՈՒՐԲ ՆԵՐՍԵՍ ԾՆՈՐՀԱԼԻ ՀԱՅՐԱՊԵՏԻ ՄԱՀՎԱՆ 800-ԱՄՅԱԿԸ (1173—1973)

Այս տարի օգոստոսի 13-ին լրանում է սուրբ Ներսես Ծնորհալու մահվան 800-ամյակը:

Հիշարժան այս տարեթվի առթիվ 1973 թվականի հունվար 16 թվակիր իր գրած արքատառ կոնդակում Վեհափառ Հայրապետը, նշելով սուրբ Ներսես Ծնորհալու պատմական դերն ու տեղը ԺԲ դարի մեր եկեղեցական տարեգրության և հայ մշակույթի պատմության մեջ որպես Հայրապետ Հայոց և մեծավաստակ մատենագիր, արդարորեն հաստատում էր, որ ԺԲ դարը առանց Ներսես Ծնորհալու անվան ու վաստակի «պիտի մերկանար... իր փառքից»:

Արդարև, Ծնորհալին, ինչպես նրան բնութագրել է ԺԳ դարի հայրենասեր պատմիչ Կիրակոս վարդապետ Գանձակեցին, «առաելեալ էր իմաստութեամբ քան զյոյովս ի ժամանակի անդ, ո՛չ միայն քան զվարդապետս հայոց, այլև քան զՅունաց և զԱսորոց, այնքան՝ մինչ զի համբաւ իմաստութեան նորա տարածեցաւ ընդ ամենայն ազգս»:

Հայրապետական կոնդակը 1973 թվականը հայտարարում էր հորեյլանական տարի և հրահանգում՝ մեծաշուք հանդիսություններով, բովանդակալից, գիտական ուսումնասիրություններով և հոդվածներով ոգեկոչել պայծառ անունը, խնկելի հիշատակն ու մատենագրական բազմաժանր վաստակը հայ եկեղեցու մեծագույն սրբի և եռամեծ Հայրապետի՝ նրա մահվան 800-ամյակի առիթով:

Հայրապետական բարեհաճ կարգադրությամբ կազմվել է հորեյլանական հանձնաժողով Մայր Աթոռում (տես «Էջմիածին» ամսագիր, 1973 թվականի փետրվար, էջ 18), որի վրա պարտականություն է դրվել հորեյլանական հանդիսությունների կազմակերպումն ու անցկացումը առաջիկա աշնանը:

«Էջմիածին» ամսագիրը ս. Ներսես Ծնորհալու հիշատակին, կյանքին, եկեղեցական, մատենագրական ու հայրենասիրական գործունեությանն է նվիրելու բացառիկ մի համար, իսկ Մայր Աթոռի՝ Հայաստանյայց եկեղեցու միջեկեղեցական հարաբերությունների բաժինն այս առթիվ հրատարակելու է օտար լեզվով մի ուսումնասիրություն Ծնորհալուն նվիրված:

Ս. Ներսես Շնորհալին թողել է բազմաժանր, հարուստ մատենագրական ժառանգություն, որն անկողոպտելի փառքն է կազմում մեր մշակույթի պատմության:

«Լճմիածին» ամսագրի սույն համարում մեր ընթերցողների ուշադրությանն ենք ներկայացնում Շնորհալու հոգևոր բանաստեղծության գեղեցիկ գանձերից մեկը՝ «Աշխարհ ամենայն»-ը, որն աշխարհաբարի է վերածել տ. Եղիշե եպիսկոպոս Դուրյանը (տես «Լույս» կրոնական շաբաթաթերթ, Կ. Պոլիս, 1905 թ., էջ 206):

Ամսագրի հաջորդ համարներում քաղվածաբար կհրատարակվեն ս. Ներսես Շնորհալու արձակ և չափածո ստեղծագործություններից այլ հատվածներ:

